

首獎

## 新公園故蹟詠懷四首

李藝明

### 日治遺蹟

風華百載此重尋，轉覺鳩居亦費心。  
久矣霸圖歸幻夢，昭然殷鑒即園林。  
嬉娛客去歌臺換，放送亭荒野蕪侵。  
銅馬奮蹄猶故態，只今唯見歲駸駸。

### 先賢亭閣

憑軒悵望黑雲屯，一水盈盈感慨存。  
豈有奇才迴世運，空餘藻翰薦英魂。  
花飛曲檻三春暮，雨散重簷八表昏。  
遺像無言風正急，憂時蒿目復誰論。

## 二三八紀念碑

空階悄立雨餘天，風蘸殘陽染杜鵑。  
鐵聚峻嶒嗟鑄錯，淚流滅汨隱飛泉。  
驚心史上無窮劫，屈指人間七十年。  
犖犖碑鐫終不改，一回細讀一淒然。

## 福德宮

古榕連理護前楹，幾許滄桑幾許情。  
廟小未妨神力廣，燈紅初映月華清。  
非隨時俗祈私願，欲為斯民祝太平。  
自愧無由稱獻納，心香一縷寄詩聲。